

## LA CUSSIENSE DI DISFÂ IL Malfat

Seben che àn plens di bregons a tornâ a fâ sù lis cjasis e a repeçà une culumie che sta passant une crise di disperâsi, i furlans e àn vût il tinp e la buine volontât e la cussiense di firmâ, dibot in centmil di lôr, par che vegni sbregade une regjon che jè speciâl dome par vie che jè la piês che àn fate in Italie: la plui bastarde, la plui «pulitiche», la plui sogjete ai berdeis de alchimie statâl e soresetatâl a danp efetîf e seguitîf di nô ch'o vin di supâse.

O vin volût fâ un scandai (pag. 5-6): al è dut un vuluç di conpomes, là che di clâr al è dome che i furlans a Rome a contin mancual dal fant di spade, che i pulitics nostrans, la puritât, a son svuarbâz dal mît unitari e che si ul salvâ Triest freant il Friûl.

Se cuanche le àn inbastide si podeve ancje capî ch'and'ere resons che obleavin cussì, cumò no si pò plui stâ a cjalâ une regjon ch'a mûr par colpe di une sitât ch'a mûr ancje chê.

S'a fossin stâz i furlans a dî di disfâ la regjon arlechine, si vares podût, come sinpri, daur dal cjanpanilist e dal incussient. Ma ancje i triestins, e par prins, e àn dit che cussì no si pò là indenant. E alore:

- co une regjon e jè unide par resons che cumò no àn plui tignince,
- co i plui diretamentri interessâts, a bramin di sei disgropâts,
- co ancje partîz «nazionâi» avonde inpuartants a scrupulin ch'al seti il câs di tornâ a viodi dute la cuistion,
- co i triestins a melonadis di une bande e i furlans a firmis a sbarin di cheâtre, cemût si puedial lâ indenant (o indaur) cu la inicitât di zà vinc' agns? La pantiane de unitât regjonâl no à mai rezût e no rêç injò. Pa la cuâl tocje propit pensâ che chêi cuatri vuarps o ustinâz (Comel, Bressani e compagne briscule) ch'a batin ancjmò su l'unitât regjonâl no ur intaresse nè di ce che pense la int nè de storie che ganbie nè dai intares culturâi, economics, comerciâi de int ch'a disin di volê pupilâ. Se nissun no le vûl e a dà danp, parcè no si ajal il fiât o l'umiltât o la cussiense di ameti che la robe no va âtri e che, pal ben di ducj, si à di cirî âtris stradis?

L'autonomie, vuè come vuè, e jè une des cundizions che no si pò rinunsiâ. Parceche si à ancjmò il bon gust di cjalâ ae cualitât dal vivi. E vivi di sotans e tun rusin continuo no ur va nè ai furlans nè ai triestins.

Esal masse, alore, domandâur ai menadôrs de unitât regjonâl di disfâ ce ch'al è stât malfat o par santescugne? Triest ch'al pratindi i siei diriz

daprûf dal stât e il Friûl ch'al gjoldi finalmentri de so autonomie. Vere e spotiche. Come che le àn volude chêi ch'a si son batûz par prins e come che le vuelin chêi che no àn parevôi. La grande disgracie e jè che il danp lu àn fat i furlans: chêi vendûz al mît de unitât «nazionâl» o de sacralitât dal partît.

«No son stâts i canons inglês ma lis pecjs dai indians a meti in sclavitût l'Indie». «O ài vude la temeritât di dî che l'autonomie nol pò dâuse nancje Diu. O vin di vuadagnâse di bessôi». Lu à scrit Gandhi, e al vâl ancje pal Friûl.

Cu la sperance che i furlans, cumò che àn tacât a sveâsi, a cjapin il gust e il savôr di inpastâ lôr la lôr storie e che i pulitics, amancul tal ultin, a ganbiin menade.

Editoriâl de La Patrie dal Friûl di Fevrâr dal 1984, n. 2